

Punë të Rëndësishme – Pjesa 1 nga 4

Mirë se erdhët në serinë më të re në kishën tonë.

Seria quhet “Punë të Rëndësishme” dhe do të zgjasë për 4 javë. Lutem që nuk do jemi vetëm dëgjues, por bërës të Fjalës. Lutem që ndërsa dëgjon, kërkoji Perëndisë, çfarë ka diçka konkrete për ty, një fjalë, një fjali që shkon me gjërat që po kalon ti. Ideja e serisë është...

Perëndia përdor njerëz të zakonshëm për gjëra të jashtëzakonshme!

Kjo seri është për ty që beson thellë brenda teje, që ti je krijuar për të bërë diçka më shumë, diçka ndryshe, që je krijuar me një qëllim, për të lënë gjurmën tënde aty ku je, për të bërë diçka të rëndësishme, diçka që zgjat.

Nëse do e kesh zemrën e hapur Perëndia do të flasë gjatë këtyre 4 javëve për të bërë diçka në lidhje me shërbesat, gjërat që ndodhin në kishë ose jashtë saj.

Pyete Perëndinë në lidhje me shërbesat: A ky është vendi ku do të përfshihem më shumë? Por, dua të të paralajmëroj. Nëse ti thua PO, do e ketë një çmim, një kosto që do paguar. Mund të kushtojë kohë, mund të kushtojë reputacionin, mund të kushtojë energji, mund të mos e mbështesin personat që ti do, mund të të keqkuptojnë, mund të tallen me ty, “ti ke 100 gjëra të tuat dhe po ndihmon dikë tjetër”...

Dhe për shkak se do të jesh besnik, Perëndia do të marrë lavdi dhe ti do të ndikosh jetë njerëzish. Ti mund të thuash, “Kush jam unë që mund të bej diçka të rëndësishme, unë jam një njeri i thjeshtë”.

Në fakt si model për këto 4 javë do të kemi historinë e një burri të thjeshtë nga Dhjata e Vjetër, që quhet Nehemia, që i qante zemra për njerëzit e tij dhe gjendjen ku ishin. E pa situatën dhe vendosi të bënte diçka. Dikush duhet të bëjë diçka, por mund të jesh ti ai dikushi. Dhe titulli i serisë vjen nga ky libër.

Tek libri i Nehemias, kapitulli 2, vargu 14, thuhet kështu:

Nehemia 2:14 “Kështu morën kurajo... për këtë **Punë Të Rëndësishme.**”

Nëse beson që Perëndia ka diçka më shumë për ty, ka një punë të rëndësishme, atëherë le ta fillojmë me një lutje:

“Na ndihmo të besojmë, Atë, që ti do të bësh gjëra të jashtëzakonshme me fuqinë e Frymës së Shenjtë në ne, dhe nëpërmjet nesh. Na jep kurajon për të hedhur hapa besimi. Na fol, na trazo, na nxit. Sepse duam të ndikojmë dikë me jetën tonë dhe të nderojmë ty me çdo gjë që bëjmë dhe themi. Të drejtohem ty Perëndi që ke bërë një punë të përsosur, dërgove Birin tënd, Shpëtimtarin e botës, Jezusin. Dhe në emrin e Tij lutemi. Amen!”

Le të fillojmë Punët e Rëndësishme!

Titulli i mesazhit të parë është: **Atëherë kur nuk duron dot më!**

Do të shikojmë një nga historitë më frymëzuese dhe motivuese në Bibël, sesi një burrë i thjeshtë solli një ndryshim të madh. Ai ishte njeri i zakonshëm. A e dini çfarë pune bënte? Ishte kupë-mbajtësi i mbretit të Persisë, mbretit Artakserksi. Ndoshta ndonjëri me të drejtë thotë, po kupë-mbajtës çfarë i bie të jetë? Në kontekstin tonë do të ishte bodyguard i kryeministrit, ose dikush që shërben nga afër. Pra, Nehemia ishte person shumë afër mbretit dhe njeri shumë i besueshëm, pra nuk nxirrte asnjë nga fjalët që dëgjonte në pallatin mbretëror. Sepse në këto kohë kishte shpesh komplete, siç ka edhe sot kudo grushte-shteti dhe kishte njerëz që e kërcënonin dhe mund ta vrisnin mbretin dhe atë.

Kupë-mbajtësi ishte personi që provonte gotën e verës, para se ta pinte mbreti, për ta parë se mos dikush ka hedhur helm në verë. Punë me spec i bie. Se një herë po u hodh helm në verë ai që e provon para mbretit vdes, kaq.

Nehemia e gjen në këtë pozicion pune, sepse ishte njeri i thjeshtë, që i shërbente nevojave të mbretit. Ja si fillon historia, kapitulli 1, vargu 2:

Nehemia 1:2 *“Arriti në Judë Hanani, një nga vëllezërit e mi, bashkë me disa burra të tjerë. Unë i pyeta lidhur me Judejtë që kishin shpëtuar, që ishin kthyer gjallë nga robëria, dhe lidhur me Jeruzalemin.”*

Nehemia po bisedon me vëllanë e tij, dhe i thotë, më thuaj si janë njerëzit në atdheun tonë.

Asyeja pse po pyet Nehemia është se 140 vite më parë—(586 P.K) Babilonët (mbreti Nebukadnezar) pushtuan Jeruzalemin dhe e shkatërruan qytetin, jetët e tyre, kulturën dhe çdo gjë, që është e vështirë për ta përshtuar me pak fjalë atë që ndodhi. A ke dëgjuar për tempullin e bukur të Solomonit? E shkatërruan plotësisht. Çdo ndërtesë në qytet u dogj dhe u shemb.

Babilonët pushtues morën pothuajse gjithë popullin në mërgim, si robër. Ata pak njerëz që ngelën ishin të dëshpëruar, të pashpresë. Kurse ata që ishin në mërgim dëshironin të ktheheshin përsëri për të rindërtuar vendin. Dhe pas shumë vitesh, dekada më vonë, 50.000 Izraelitë u kthyen për ta rindërtuar Jeruzalemin. “Do e ri-bëjmë qytetin tonë të bukur, vendin që duam kaq shumë, do ndërtojmë të ardhmen në atdheun tonë.”

Por ata nuk po ecnin aq sa duhet, kishin ngecur, u munduan të ri-ndertonin tempullin, por nuk është se arritën gjë.

Ky është momenti kur Nehemia pyet vëllain, për Judenjtë që kishin shpëtuar dhe ata që ishin kthyer nga robëria në atdhe. Ja si i tha vëllai:

Nehemia 1:3 *“Ata më thanë: “Ata që kanë shpëtuar nga robëria janë atje poshtë në krahinë, në një varfëri të madhe dhe me faqe të zezë; përveç kësaj*

muret e Jeruzalemit janë plot me të çara dhe portat e tij janë konsumuar nga zjarri".

Në këto kohë, qytetet mbroheshin nga mure rrethuese dhe porta të mëdha, si formë kështjellash. Njerëzit jetonin brenda mureve. Por muret janë plot me të çara, nuk ka porta, që i bie mund të vinte kush të dojë, mund të pushtonte e plaçkiste kush të donte. Ishte situatë e pashpresë. Nga t'ia fillosh, çfarë të bësh kur shikon diçka që ta thyen zemrën. Kur shikon se është një punë e rëndësishme për t'u bërë, që s'po e bën njeri.

Çfarë të bësh kur shikon diçka dhe të pikon në zemër që s'po vë dorë njeri, dhe ti trazohesh aq shumë saqë nuk duron dot më? Dua të jap tre parime nga historia e Nehemias...

Nga Ta Fillosh Punën e Rëndësishme.
Le të shikojmë Nehemian! Ai së pari tha:

1 - U ula dhe qava.

Nehemia 1:4 *"Sa i dëgjova këto fjalë, u ula dhe qava..."*

Kur dëgjoi se si ishte situata, kur dëgjoi se sa të dëshpëruar janë njerëzit, u ul dhe qau. Iu thye zemra. Po prit more vëlla, pse?

Po shikoja në hartë, Nehemia është më shumë se 1.500 km larg Jeruzalemit. Po shikoja diçka të ngjashme, i bie nga Tirana në Frankfurt të Gjermanisë. "Ej, shoku, ti je në Gjermani, ti je për qejf, ç'e vret mendjen se çfarë bëhet në Tiranë. Nehemia, ti je në pallatin mbretëror, bën jetën më e rehatshme në botë. Ti jeton në super shtëpi, po ushqehesh nga tavolina e mbretit. Ti e ke TV 50 e ca polsh, 3D, 4K. Ti je duke bërë selfie çdo ditë, sot me mbretin. Sot shoqërove mbretin për golf. Sot, erdhi mbretëresha e Anglisë për çaj nga pallati. Sot këtu, nesër aty. Lëre more vëlla, pse të bie mendja te atdheu. Le që mos bli digitalb fare, edhe po ta kesh blerë, mos e rimbush më. Shif MTV gjithë ditën. Kanale te gjermani pafund, pse të intereson çfarë po ndodh në atdhe, ti je në mes të luksit, jeta e fundit."

Ose, e ke parasysh, je duke parë foto në social media, kalo foto, kalo foto, dhe ndalon në ndonjë foto ose situatë të vështirë. *"Furtuna shkatërron Bahamas.* Eh, sa keq që më vjen. Po eja se vetëm 30 vetë paskan vdekur.

Ose situata pa fund nëpër Shqipëri, njerëz që po kalojnë sfida nga më të ndryshmet. "Gjynaf po më vjen për filanin, se ka qenë çun i mirë."

Kështu është gjithmonë qëndrimi jonë?

A ka ndonjë moment si puna e Nehemias? Që kur shikon diçka, të trazon. Të dhemb në zemër. Ai mund të kishte thënë, "Hej, po si nuk u bënë një herë këta

shqiptarët more vëlla, nuk bëhet Shqipëria me shqiptarët,” dhe ndërronte kanalin e TV.

Jo, jo, ai pa një situatë, dhe iu thye zemra, filloi të qante.

Po ty çfarë ta thyen zemrën? Çfarë të rëndon kur e shikon? Çfarë të zemëron kur e shikon ose dëgjon? “Kjo nuk është e drejtë, une duhet të bëj diçka.” A ka diçka te familja jote? A ka diçka te fisi yt? A ka diçka në kishë? A ka diçka në qytetin tënd, apo te lagjja jote?

Dikush tha, “Më pikon në zemër kur shikoj fëmijët që vuajnë.” Një tjetër tha, “Fëmijët me nevoja të posaçme.” Një tjetër, “Bullizmi në shkolla më bezdis shumë, shumë.” Abuzimi në familje, njerëzit me varësi nga alkooli dhe drogat. Ata që janë bërë robër të pornografisë. Ndoshta janë fëmijët në rrugë, ndoshta jetimët, të pastrehët. Ndoshta të varfërit që s’kanë ç’të hanë, ndoshta vajzat e trafikuar. Ndoshta ungjillizmi, të dhemb zemra që ka njerëz që nuk kanë dëgjuar për Zotin akoma, do të doje të ndërtoje një lloj sistemi që çdo njeri të paktën të dëgjojë për Lajmin e mirë, por do të doje të shkoje vetë gjithashtu. Ndoshta të lodhin kaq shumë aborte që po ndodhin. Apo t’i dalësh krah dikujt që s’ka zë.

Çfarë ta thyen zemrën ty? Çfarë ke të rëndë në zemër? Jam mirënjohës Zotit për kaq shumë gjëra që ka bërë kjo kishë për vite tashmë. Sa shumë të rinj, studentë, nevoja keni prekur. Por a është vetëm kaq?

Çfarë është ajo gjë, që të mbush sytë me lot? Çfarë bën ti, kur nuk duron dot më? Çfarë bëri Nehemia? Ai tha:

2 - Rashë Në Gjunjë Dhe u Luta.

Nehemia 1:4 “...pastaj mbajta zi disa ditë me radhë, agjërova dhe u luta përpara Perëndisë të qiellit.”

Më dëgjo me kujdes, nëse ajo gjë që ti ke në zemër, të shqetëson aq sa të mbush sytë me lot, ajo gjë duhet paketuar me shumë lutje. Disa herë themi, “Unë provova çdo gjë, kur e pashë që nuk po ecte asnjëra thashë të lutem një herë”. Ngjan sikur: “Zot, e ke radhën ti tani.”

Ooo, Perëndia është i gjithëdijshëm, gjithëfuqishëm, kudondodhur, dhe ti e le atë kur s’ke çfarë bën më? Jo, jo, Perëndia, lutja, ardhja para Perëndisë le të jetë e para. Sepse 1 + Perëndia = shumica
Nehemia u lut fuqishëm, ja si thuhet:

Nehemia 1:5-6 “Dhe thashë: "Të lutem shumë, o Zot, Perëndia i qiellit, Perëndi i madh dhe i tmerrshëm, që i qëndron besnik besëlidhjes dhe ke mëshirë për ata që të duan dhe respektojnë urdhërimet e tua, qofshin veshët e tua të vëmëndshëm dhe sytë e tu të hapur për të dëgjuar lutjen e shërbëtorit tënd që

tani ta drejton ty ditën dhe natën për bijtë e Izraelit, shërbëtorë të tu, duke rrëfyer mëkatet e bijve të Izraelit.”

Nëse do e lexosh gjithë librin e Nehemias - meqë ra fjala ju sugjeroj ta lexoni këtë javë – do të shohësh se ai rrëfen fajet e veta, fajet e bijëve të Izraelit. I kujton Perëndisë premtimet dhe besnikërinë e Tij. Pasi agjëron dhe lutet, ai shkon para mbretit dhe i kërkon leje. Para se të bisedojë me mbretit ai lutet kështu...

Nehemia 1:11 “...jepi sot të lutem, një sukses të mirë shërbëtorit tënd, duke bërë që ai të gjejë zemërbutësi në sytë e këtij njeriu.”

Sa i veçantë që është Nehemia, ai lutet për çdo gjë. Dhe e di sesa mund të kuptosh nga një njeri nga menyra sesi lutet? Nëse lutemi vetëm me: “Zot bekoje këtë ushqim, më beko mua sot, më ndihmo mua sot, prishja mendjen asaj gocës për mua sot”. Mënyra sesi lutesh tregon se çfarë beson ti për Perëndinë. Nëse lutjet janë të cekëta, nuk beson që Perëndia është i madh dhe i fuqishëm. Lutu fuqishëm me lutje të mëdha. Zot, më përdor mua. Zot, të kërkoj të pamundurën. Zot, lëviz fuqishëm, bëj mrekulli, sill shërim. Sill ringjallje. Zot, më përdor sot, të ndikoj dikë për ty.

Kemi 12 lutje të Nehemias të shkruara te libri i tij. Me shumë siguri ai është lutur me qindra e mijëra herë. Por e shikon që lutet në fillim, lutet gjatë, lutet në fund.

Dhe një gjë që është shumë e veçantë, ai është Lider i Paparë. Është shumë praktik në çdo hap. Ai studion, ndërton strategji, ndan vizion, i delegon punët të tjerëve, është lider i paparë. Dhe përsëri, është i përvullur dhe ka një marrëdhënie të ngushtë me Perëndinë dhe varësi të madhe te Ai.

Nga t’ia fillosh Punës së Rëndësishme? Asaj gjësë që nuk po e duron më?

Së pari, e lejon të prekë zemrën, pastaj ulesh edhe qan. Dhe pastaj ulesh në gjuhë dhe lutesh. Dhe kur ta ka thyer zemrën dhe ke kërkuar mirësinë e Perëndisë, cila është e treta?

3 – U çova dhe veprova

Nehemia merr kupën dhe shkon te mbreti. Ai e ka zemrën copash dhe mbreti e dallon.

Nehemia 2:4-5 “Mbreti më tha: “Çfarë kërkon?”. Atëherë unë iu luta Perëndisë të qiellit dhe pastaj iu përgjigja mbretit: “Në qoftë se kjo i pëlqen mbretit dhe shërbëtori yt ka gjetur mirëdashje në sytë e tu, më lejo të shkoj në Judë, në qytetin e varreve të etërve të mi, që ta rindërtoj atë”.”

Çfarë bëri Nehemia, kur i foli mbreti? U lut me të shpejtë. Dua të shkoj në Jude. Po pse? Sepse dua të rindërtoj muret, njerëzit e mi janë të lënduar. Qyteti është i pambrojtur dhe unë nuk rri dot pa bërë diçka. Dikush duhet të bëjë diçka, por mesa duket Perëndia po më kërkon mua të bëj diçka.

U çua dhe veptoi.

Çfarë është diçka që të bezdis ty? Ndoshta sa herë të vjen në mendje, mundohesh ta largosh. Por mos e largo, lërë të zbresë në zemër, ndjeje dhimbjen, sa të biesh në gjunjë dhe të lutesh, kërkoji Perëndisë favor. Por pastaj, çohu dhe bëj diçka, edhe nëse janë hapa të vegjël.

Ndoshta do kesh dyshime. Do thuash, “Por unë s’jam si ju, unë s’jam gati, unë nuk di, nuk jam trajnuar, nuk kam përvojën, shkollën për atë gjë.” Dëgjoje, ndjeje, çfarë po të shtyn Perëndia.

Një mënyrë për të kuptuar se çfarë do Perëndia të bësh është, për çfarë ankohesh më shumë. Çfarë nuk të pëlqen sesi po bëhet? Vendos një palë syze të reja, mos u anko por shikoje si mundësinë tënde për të bërë diçka. Në forma të vogla apo të mëdha.

Çfarë është ajo gjë që të thyen zemrën ty? Ndoshta, si Nehemia, ti je person i thjeshtë, por ka shumë punë të rëndësishme për t’u bërë nga ty, rreth e qark teje. Nehemia nuk e mbaroi punën vetëm, por asgjë nuk ndodhi derisa ai filloi.

Po ti çfarë bën kur nuk duron dot më? Ulesh si shqiptari tipik dhe flet për atë gjë, shan sistemin, shan komshinjtë pa edukatë, pason topin, “ata e kanë fajin, ata janë kështu e ashtu”?

Ajo që të rëndon zemrën, ti e lë të zbresë në zemër, ta thyejë, ti lutesh, kërkon favorin e Perëndisë. Pastaj çohesh dhe i përvishesh punës.

Mund të jetë diçka te familja, fisi yt, që s’po bën njeri, te lagja jote, te pallati yt, te fshati yt. Te kisha jote. Çfarë është diçka që mund të bësh ti, te kisha jote? Po sikur çdo javë të bësh diçka 2-3 orë në javë? Kaq.

Lutem shumë që Perëndia ju ka folur një fjalë sot. Frymë e Shenjtë, na trazo. Trazo çdo person sot për të bërë punë të rëndësishme.

Disa herë Perëndia lejon që dhimbja jote të kthehet në një shërbesë të bukur! Çfarë dhimbje ke kaluar këtë vit, këto kohë? A është ajo që Perëndia do të bësh, të ndihmosh njerëz që kalojnë nëpër të njëjtat situata që kalove ti?

Kush është trazuar sot? Kë ka bërë të mendueshëm ky mesazh sot? Ngrije dorën.

Le të lutemi.

Lutja e shpëtimit.

Punët e Rëndësishme janë gati për të filluar që tani.

Le Të Fillojë Puna e Rëndësishme!